



O ARCEBISPO  
DE  
SANTIAGO DE COMPOSTELA

## Carta Pastoral na Coresma do 2018

Queridos diocesanos:

Imos iniciar o tempo litúrxico da Coresma, “signo sacramental da nosa conversión, que anuncia e realiza a posibilidade de volver ao Señor con todo o corazón e con toda a vida”, como nos di o Papa na súa Mensaxe para a Coresma<sup>1</sup>. De maneira especial a Igrexa chámamos a volver a Deus porque talvez abandonamos o amor primeiro e mantémonos nesa morneza que El detesta, necesitando o colirio da espiritualidade para que os nosos ollos poidan velo. Dáanos esperanza saber que “o Señor está de pé á porta e chama. Se alguén escoita a súa voz e abre a porta, entrará cabo del e ceará con el e el comigo” (cf. Ap 3,14-22).

### **A Coresma como chamada**

A Coresma é unha chamada: o Señor pronuncia o noso nome porque nos coñece, ámanos e está pendente de nós. O máis íntimo en nós non é a nosa debilidade senón Deus, como dicía santo Agustíño. Habemos de ter moi presente esta realidade no noso peregrinar coresmal para non encerrarnos no noso bucle egocéntrico nin vivir unha vida de mínimos. A nosa vida pode ser resposta cando nos deixamos preguntar por Deus. Así poderemos ver as debilidades como oportunidades para que se mostre a fortaleza de Deus. O Papa advírtenos que habemos de liberarnos dos falsos profetas que nos inducen a pensar que un pracer momentáneo é a felicidade ou que a nosa afirmación humana é fiarnos da nosa autosuficiencia ou que pode haber fecundidade apostólica e espiritual á marxe da cruz. “Non é unha sorpresa: desde sempre o demo, que é mentireiro e pai da mentira, presenta o mal como ben e o falso como verdadeiro, para confundir o corazón do home”. Lembremos aquelas palabras do evanxelista San Xoán: “Meus amigos, non fiedes en calquera espírito, mais ben, poñede a proba os espíritos para ver se veñen de Deus. Porque entre nós saíron polo mundo moitos falsos profetas... Eles son dos do mundo; falan ao xeito do mundo e por isto escóitao mundo” (1Xn 4,1.5). Necesitamos facer un recoñecemento ao noso corazón para evitar todo aquilo que apaga a caridade nel. O Papa fai referencia á avidez polo diñeiro, ao rexeitamento de Deus, á violencia contra aqueles que consideramos unha ameaza, á negligencia en coidar a nosa casa común: a terra, o mar, os ceos, e á

---

<sup>1</sup> FRANCISCO, *Ao crecer a maldade, enfriarase o amor na maioría* (Mt 23, 12).

mundanidade espiritual que “é buscar, en lugar da gloria do Señor, a gloria humana e o benestar persoal” (EG 93).

### **Remedios para estes síntomas**

Para remediar estes síntomas da enfermidade que apaga a caridade a Igrexa, onte como hoxe, proponnos a oración, o xaxún e a esmola que nos axudan a atoparnos connosco mesmos, cos demais e con Deus no camiño cara á celebración do misterio pascual. A oración, segundo a reflexión do Papa, “fai que o noso corazón descubra as mentiras secretas cos cales nos enganamos a nós mesmos, para buscar finalmente o consolo en Deus”. O xaxún “debilita a nosa violencia, desármanos, e constitúe unha importante ocasión para crecer”. A esmola que ha de ser un estilo de vida, “libéranos da avidez e axúdanos a descubrir que o outro é o meu irmán: nunca o que teño é só meu”. Como escribiu o apóstolo San Xoán: “Se un di: ‘Eu amo a Deus’, pero odia a seu irmán, é un mentireiro. Porque quen non ama a seu irmán, a quen está vendo, non pode amar a Deus, a quen nunca viu: este é xustamente o mandamento, que temos recibido del: que quen ama a Deus, ame tamén ao seu irmán” (1Xn 4, 20-21). Pídesenos dar unha resposta desde a fe e desde o Evanxeo aos nenos que están a perder insipidamente a súa infancia, aos mozos que non atopan sentido á súa vida, aos adultos que vagan na indiferenza, ás familias que están a se rachar, aos anciáns que gastan o atardecer da súa vida sen motivos para a esperanza.

### **24 Horas para o Señor**

Neste camiño coresmal non esquezamos a celebración das 24 horas para o Señor, que terán lugar o venres 8 e o sábado 9 de marzo. Na adoración eucarística atopamos tamén o clima propicio para celebrar o Sacramento da Reconciliación cuxa experiencia nos leva a ser misericordiosos cos demais. Rogo que na Catedral, nas parroquias e nas comunidades relixiosas se programen momentos de adoración ao Santísimo, lectura da Palabra de Deus e celebracións penitenciais no contexto de 24 Horas para o Señor.

Feliz camiño cara á Pascua! Saúdavos con afecto e bendí no Señor.



+ Julián Barrio Barrio,  
Arcebispo de Santiago de Compostela.